

AI lectur

Objekttyp: **Preface**

Zeitschrift: **Il glogn : calender dil pievel : annalas per historia, litteratura e cultura romontscha**

Band (Jahr): **25 (1951)**

PDF erstellt am: **03.06.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Al lectur

Uonn compara il Glogn per la 25avla ga. Raschun de far fiasta e giubilar? Strusch aunc! Ils emprems 25 onns ein per ordinari buc ils pli stuffis. Per ina ein ins els onns d'emprema giuentetgna e per l'autra aunc plein forza ed entusiasmus pils ideals, ch'ins cultivescha cun plascher e pissiun. Quell' uisa ei tut iu pli tgunsch e maneivel e nus sperein oz, ch'il puls de veta idealia detti vinavon, ferm e stagn, aunc inaga 25 annadas, per che nus sappien lu far ton pli biala fiasta ils anno 1976! — Nunpusseivel ei quei buc, sche nus stein sauns sco tochen dacheu, ha gie il redactur dil Glogn aunc in'uriala buca 50! —

Arrivaus ch'il redactur ei sils megliers onns, ha el speranza de viver ditg e viver bein, e num ch'el scarpetschi e vegni en brauncas, ha el il giavisch de scriver il Glogn aunc onns ed onns, quei dultsch quita, ch'ei encarschius ad el profundamein el cor ...

Il Glogn ei comparius per l'empremaga 1927 a Glion, casa editura Murezi Maggi. Ils dus emprems onns (1927 e 1928) eis el vegnius redigius da Sur Antoni Schmed, hodiern plevon de Degen. —

Il redactur ded oz seregorda aunc fetg bein d'in di d'atun dils anno 1926, ch'enzaconts students romontschs sesanflavan el tren denter Ursera e Caschinutta e che Sur Antoni Schmed, da lezzas uras plevon a Ruschein, ha offniau a nus ch'el edeschi uonn in calender romontsch cul num «Glogn», principalmein per la Foppa e contuorn. (Nus eran sin via per la fiasta dils «Students svizzers» ad Altdorf). El ha envidau enzaconts de nus de collaborar a quel, ed jeu, aunc giuvenets e de levsenn, hai immediat sepurschiu de gidar sco jeu sappi. Aschia hai jeu gia quei emprem onn dell'esistenza dil Glogn contribuiu ina novelletta humoristica: «La guardia della Piora», sut il pseudonim de «Giachen Militèr». — 1928 hai jeu schizun giu la gagliardia de «tarmetter en» duas lavurettas: «Regurdientschas» ed «Il contract de maridaglia». Tgei hopras, tgei plascher, tgei pissiun! Con savens vevel jeu che barschava osum la detta: in regl nundescrivibel de scriver!

Per anno 1929 ha signura A. Maggi-Baselgia purschiu a mi la redacziun dil Glogn. De quei vess jeu mai schau dar el tgau, gnanc en siemi buc! Ed jeu, peis a pèr si tier P. Baseli Berther, en ina febra sco aunc mai, per dumandar tgei ch'el manegi de quei. Jeu vesel aunc ussa siu tgau calirau e ses plaids tunan aunc oz en mias ureglas: «Secapescha, che ti acceptas! hic Rodus, hic salta! Entscheiver ston ins da giuven! Ti has temperament,

has fantasia e scrivas in undreivel lungatg popular. Allò, curascha! Pli bugen enqual tuppadad, che far nuot! E dil reminent han ins quell'uisa caschun de scurnar enqual tgiern, che ti has de memia.» — E cun quei eis ei stau fatg! E suenter tonts onns scarvin nus aunc adina il Glogn, malgrad ch'ins ei buc aunc vegnius a frida de scurnar tut mes corns . . .

Ils emprems onns han ins attaccau e pitgau bravamein; jeu erel fetg sensibels, mo P. Baseli era aunc cheu, teneva sidretg il ballucccont, encuraschava, admoneva, distingueva, criticava objectivamein e repeteva ad in repeter: «Tegn stendiu, tegn stendiu! In di che jeu sun buca pli cheu, eis ti cuntents, che ti has teniu!» — Ed igl ei iu e va aunc adina . . .

In onn ch'il Glogn veva plaschiu caussas a sgr. dr. Conradin Hess p. m., ha el schau clamar mei e detg denter auter: «Jeu legel mo treis calenders: il «Kalender der Waldstätte», il «Republikaner» de G. B. Rusch e vies Glogn. Il vies ha la medema tempra sco'ls allegai. Quels dus ein deplorablamein i en — e vus stueis era quintar in di culla medema sort. Il pievel cumin surporta buca pli ch'ina certa tempra e qualitad! Mo malgrad tut, vinavon silla medema via; ins sa mai: ei sto gie buc ira cun tuts tuttina . . .»

Probabel era il Glogn buc aschi buns, sco'ls dus sura allegai — e perquei eis el mitschaus della mort. Da l'autra vard eis ei era buca sclaus, ch'il pievel romontsch, che sa distinguer dètg bein denter bien e mender, ha tartgau schar viver quei schani, sinaquei ch'el possi semigliurar cul temps e semussar digns della veta . . .? — Seigi sco ei vegli: enzaco ei il Glogn vegnius 25 onns, ed oz eis el segirs de buca stuer murir pervia dil treranavos. De scriver tut quei ch'ei schabegiau e capitau duront quels 25 onns cul Glogn e sia redacziun . . . gliez dess in'interessanta cronica, che mass lunsch sul tscherchel dell'ordinaria introducziun dil Glogn — mo nudau ei quei tut! (Forsa in'autraga cun caschun?) Ton savein nus gia dir oz, resummond mo il principal: Ils emprems onns ei il Glogn vegnius attaccaus, e lu ina partida onns ignoraus, per allura vegir cordialmein beneventaus! Tonpli selegrein nus oz, ch'il Glogn viva e va vinavon — pli frestgamein che enzacu. Quei havein nus d'engraziar oravon tut alla Stampa e Casa editura Murezi Maggi artavels, Glion, e buc il davos a nos collaboraturs ed amitgs, ch'ein per part gia duront dus decennis propri fideivels campiuns dil Glogn e sia fin e mira. Jeu allegheschel cheu cun plascher Sur G. B. Salm, Sur can. dr. C. Fry, Sur G. Cadieli, sgr. scolast T. Halter, sgr. cand. iur. Donat Cadruvi ed auters biars.

Il redactur conceda bugen, che lev seigi nuota adina stau — cunzun all'entschatta buc — de «tener la dira», tonpli ch'il Glogn ei «mo» ina interpresa privata, ni pupergnada ni distinguida cun «subvenziuns pil mante-niment dil lungatg romontsch el pievel», sco outras interpresas de medema u semiglionta natira, che han — essend organisadas sco societads ed uniuns sut las alas della LR. — capiu (cun tutta raschun, secapescha!) de menar l'aua sin lur roda-mulin, e quei malgrad ch'ellas han nuota prestau depli. Quei seigi detg e punctuau — buca per seludar u selamentar; anzi, per

metter leu la caussa sco'la ei, essend ch'ei dat biars che creian, che nies annuari per la litteratura e cultura romontscha audi era tiels retila-pensiuns della Ligia Romontscha!

Sia existenza ha il Glogn d'engraziar al pievel della Sur- e Sutselva, e gliez ei quei che tegn el e la redacziun sidretg e dat adina puspei anim e plascher de continuar! Fuss ei buca stau quella suatientscha, nus vessen franc stuiu better tut pil tempel en . . .

Oz a caschun de nies «Glogn giubilar», engrazia il redactur al pievel per quei sustegn, munta ei gie per el il pli grond success de veser, co nies pievel carezza la lectura, l'instrucziun, sco era la cultivaziun de tut ils beins spir-tals e culturals, artai de nos vegls.

Pilvermò, sche vus savesses tgei plascher e satisfacziun nus havein giu bunamein onn per onn, constatond entras brevs, tarmessas a nus ordmiez il pievel, co sempels purs e perfin puras demussavan senn e capientscha per tut quei che nus publicavan e ch'apparteneva oravon tut a lur cultura, tradiziun, a lur sentir e patertgar, a lur historia locala, ensumma a tut quei che sa e sto muentar spért e cor de scadin bien patriot.

En vesta a quels fatgs e vesend dretg e seniester de nus, co la veglia cultura romontscha d'autras contradas sescrula e sesfundra ella mar materialistica dil temps modern — malgrad subsidis e subsidis — eis ei per nus in plascher d'astgar continuar cun nies Glogn e sia beincomprovada finamira. — —

«Il Glogn giubilar» dedichein nus al pur romontsch. Tut spezial engraziament a nos capavels ings. agronomi romontschs, che mettan uonn a disposizun al Glogn lur savida e lur experientschas, e quelluisa alla patria romontscha. —

All'entira famiglia dil Glogn, a ses collaboraturs, lecturs ed amitgs nies pli cordial salid ed engraziament giubilont.

Redacziun e Casa Editura

— * —